

殿志 648

地 310  
42-3  
21

此為未定初稿尙希

大雅宏達諸君子有以是政而點定之幸甚

惠函請寄福州城內烏石山通志局

沈瑜慶  
陳衍 啟

福建通志凡例

福建通志凡例初稿

一本書只名福建通志不加重修續修等名

按從前福建通志存者乾隆間本稱續道光間本稱重纂實多未當之處今擬改絃更張循名核實期合於通志二字名義故只稱福建通志

按從前福建通志存者乾隆間本稱續道光間本稱重纂今若復加重修續修等字則無以別於諸本且諸本體例

一前志修於道光年間以前者宜重修以後者宜續修今擬先定重修體例再定續修體例重修體例定則續修者以類相從惟新創各門補前此所無者而已

一通志體例宜仿正史也周禮四方之志與邦國之志同掌於史臣志即史矣故陳壽之書名志太史公之稱史記即志也左史記言右史記動史特官名耳左傳言楚史倚相能讀三墳五典八索九丘墳典即邦國之志丘索即四方之志尙書大傳云天子有問無以對責之疑有志而不志責之丞故鄭曰鄭志宋曰宋志則史之範圍所及皆志之範圍所及也其有不同者禮樂刑法各志為中國全國所公共宗室宦者佞幸四夷各傳及各國載記非一省所有則不載耳

一各省通志體例宜仿鄭氏樵通志而損益之也通志即通史尙書合虞夏商周為

福建通志凡例

一書史記上起黃帝下訖麟止皆非斷代之書南北史五代史畧仿其例此鄭氏通志所由作也自班孟堅創為斷代之史史乃與志異漁仲嘗譏之然一代既亡文獻久則無徵斷代之史不可不作不必以此而笑彼也至鄭氏為全國通志故包羅衆有今通志為一省之志則如年譜氏族略六書略七音略禮略諡略器服略樂略刑法略之類不以各省而異同者皆所當損餘已詳第三條其當益者另詳

一方志須首增通紀也天下無無主之國無政之國晉之乘楚之檣杞魯之春秋以至百二國寶書皆國史實皆方志也國語彙各國之政以成書仍以國別之方志之總匯後世一統志所自昉也而冠以周語即鄭氏通志首列帝紀所自昉然猶曰此一統之志也魯史必稱周禮韓宣子見易象魯春秋謂周禮盡在魯矣正月必繫周王可知外史之體例矣今各省通志可謂無主之國無政之國矣宦績有傳武功有傳散無統紀也一省之大治亂分合因革興罷諸大事無從稽攷也正史於國家大事雖散見於

各傳各志而必以本紀總其大綱今之通志何嘗不知其當然於是朝廷大政於本朝則彙詔諭爲一門前朝固闕如也一省之治亂分合多起於戰爭而前志則散見於外紀是外有紀而內無紀也亂爲客平亂者爲主豈得轉屬於外海防武功各門其尤謬者內地兵事則散見於封爵一門封爵只宜立一表歸職官類豈能以全省武功屬之且古今有功而不爵爵而無功者不知凡幾於是又散見於武功武宦績各門可謂茫無頭緒矣竊謂通志之名昉於漁仲漁仲之通志全國之通志也方志之名通志一省之通志也漁仲通志首歷代本紀方志亦當首紀歷代大事要政元張用鼎金陵志彙歷代治亂因革興罷諸大綱創爲通紀小儒不知以爲若表若志若傳方志皆得爲之惟紀不得爲其蔽甚矣紀者紀一代之事無所繫繫之於歷代帝王而已顏師古曰紀理也統理衆事而系之於年月是也今擬削去前志詔諭一門而仿金陵志之例舉歷代用行政兵民事巨案大獄關於本省者輯爲通紀其非關本省者不錄以別於全史之本紀焉

高氏澍然改名爲典敢於犯尙書之帝典而不敢犯史記之本紀亦其蔽矣章氏學誠云後世史上詳於下郡縣異於封建方志不復視古

### 福建通志凡例

國史而入於地理家言則其事已偏而不全又云史之有紀肇於呂氏春秋十二月紀史遷用以載述帝王行事而方州之志則多惑於地理類書之例不聞有所遵循是則振衣而不知挈領詳目而不能舉綱例以義處方志撰紀以爲一書之經矣

一年表以時代爲經以郡州縣爲緯戶口科舉職官陳數題名外無甚事實者宜用之曷域府州縣各有沿革非立表不足以明之漢書戶口卽分載於地理志內今年代既久戶口分併增減非立表不足以詳之節孝一門無事實者亦宜列表

一職官科舉各表當先詳制度後列題名新法各選舉另表附科舉後

一通紀各表各列傳皆仿正史稱紀稱表稱列傳惟志一類稱志似與通志總名相犯荀子有言有大別有小別有大名有小名通志大名也則書中各志爲小名小名宜有以別於大名故班氏因既名漢書遂改太史公之八書稱志鄭氏因書名通志遂改各志稱畧然自隋書新舊唐書舊五代史以迄宋元明史莫不稱志惟新五代史稱攷則志外可稱者有書畧攷三名但稱書嫌於統詞稱攷偏於攷古稱畧則從鄭氏之舊而常璩華陽國志正方志之首其大名稱志其小名又稱巴

志漢中志蜀志南中志公孫述劉二牧志劉先主志劉後主志大同志李特雄勢志後賢志序志不嫌與大名相複而其閒先賢士女總讚廣漢士女總讚漢中士女總讚亦不專用志名今擬各志徑稱志固有例可援矣

一前志星野一門擬準各正史例改名天文而增經緯度數及二十四節氣晝夜刻一地理分疆域府州縣山川海道而城池水利津梁關隘郵驛公署學宮學校書院壇廟寺觀屬建築者以及各種古蹟皆地理之餘不必更標建置名目

一山川之山與名勝相出入山川之川與水利相出入須分析明白也

一地方稱謂疆域沿革水道改流自來沿訛者詳加辨證而各府州縣命名之始必攷其所取義

一前志蠲振一門宜併歸通紀也

一金石自爲一門不附古蹟閒加攷據也

一經籍改名藝文分四部而以類相從不以人爲別也藝文志創於漢書本於七錄

七畧以書爲別不以人爲別隋書經籍志亦然前志以各人著述爲別今改藝文之名先於經籍今從其朔閒加提要亦班書之例也

一藝文志不錄詩文文有關係詩有資考證者各從其類錄之如建置有記錄於各建置之下行政有奏議錄於各行政之下

一外島互市外交乃入外紀與外人兵爭非外紀也

一數十年來新政應行編志者有學堂留學海關厘金船政炮臺郵政電報鐵路航船鑛務實業警察新軍地方自治司法獨立交涉教務各類

一人物只統稱列傳不更冠以人物之稱也志有列傳本仿史例鄭氏通志已然何嘗冠以人物之稱乎章氏學誠云近代志家以人物爲綱而名宦鄉賢流寓諸條標分爲目其例蓋創於元明之一統志而部府州縣之國別爲書亦用統志類纂之法可謂失其體矣

一除循吏儒林文苑忠義孝友隱逸藝術方外列女外皆只稱列傳也章氏學誠云

列傳之有題目蓋事重於人如儒林循吏之篇初不爲施孟梁邱龔黃卓魯諸人而設也又云馬班儒林之篇以六藝爲綱師儒傳授自成經緯所以明師法之相承溯淵源於不替非若尋常列傳詳一人之生平者也誠哉是言又云晉摯虞創爲文章志叙文士之生平論辭章之端委范史文苑列傳所由昉也自是文士記傳代有綴筆文苑入史亦遂奉爲成規由斯以談立傳標題之故斷可識矣

一前志封爵外紀武宦績各門加以剪裁皆可併入通紀而良吏武功兩傳亦有可節采者餘皆歸入列傳也

一宦績擬改稱循吏也循吏列傳創於史公而孫叔敖子產公儀休石奢皆國相也李離亦官大理吏固大小之通稱後世以爲專屬親民之官限於牧令矣今自督撫以下凡有利民政績者皆入焉章氏學誠創爲政畧一門於古無徵

一前志既有宦績又有良吏蓋以宦績屬他省之人宦於本省者以良吏指本省之人吏於他省者然而稱名易混矣本省之人既吏他省在本省未宜稱之爲吏况

明以前固多以本省之人吏於本省將歸於宦績乎抑歸於良吏乎今擬削去良吏標目散入列傳其吏於本省而良者亦然蓋名從主人之義也

一前志既有武宦績又有武功武功皆本省人亦閒見於武宦績今擬削去武功皆入列傳用史記李廣公孫賀蘇建各傳之例也其武宦績之屬他省人者皆本省治亂所關編入通紀

一一人不得入兩傳當從其重者史記董仲舒入儒林傳漢書則仲舒但入列傳而於儒林傳中著其傳公羊之學韋賢但入列傳而於儒林傳中著其傳魯詩之學王吉但入列傳而於儒林傳中著其傳韓詩之學皆寥寥數語並各言其自有傳非更爲立傳也史記仲尼弟子列傳既詳子貢貨殖傳又及子貢越世家既詳范蠡貨殖傳又及范蠡似一人入兩傳矣不知非也凡列傳必詳其姓名與字與里仲尼弟子列傳云端木賜衛人字子貢是子貢列傳也至貨殖傳但云子貢既學於仲尼而仕於衛廢著鬻財於曹魯之間七十子之徒賜最爲饒益原憲不厭糟

糠匿於窮巷云云共十三句以證貨殖之事非爲子貢作傳也貨殖傳首段統論貨殖凡數百言後段統論天下地勢物產凡數千言而中間舉范蠡子貢白圭猗頓烏氏侏寡婦清六人爲證末又舉程鄭刁閒等多人爲證實一篇貨殖論如平準書中之言卜式桑弘羊顏異楊可諸人事卜式事叙至數百言何嘗爲式作傳哉至范蠡不但貨殖傳非爲蠡作傳卽越句踐世家叙蠡事至千百言然名從主人亦不得謂爲蠡作傳也前志如陳襄旣列宦績又列儒林朱熹旣列宦績又列道學劉克莊旣列宦績又列儒林敖陶孫旣列宦績又列文苑俞大猷旣列武宦績又入列傳此類不可勝數且皆洋洋千百言各具列傳體製非刪其一不可一道學但入列傳不別立道學之名也高氏澍然云道學名傳創於元史臣之撰宋史由未諳史例妄生支節凡史傳標目爲彙傳體皆就人所偏至者爲言周程張朱道全德備宜特傳顧降與偏至之士同科是欲加異反夷諸彙傳欲尊而適卑之也譬諸作孔子傳名以道學爲大乎抑不標目爲大乎可爲加異濂洛關閩者

進一解也且標目而曰道學辭尤不典道統辭也非如儒林文苑名目就其偏至可專名之也以統辭標目將不在是傳者皆道外人乎不甯惟是列傳之范文正公司馬溫公歐陽文忠公已從祀廟廡者不皆道外人乎可乎不可也明史特削是目足破元史臣之謬云云案宋史在諸史中燕謬特甚旣立姦臣之傳乃有秦檜而無湯思退有韓侂胄賈似道而無史彌遠卽如道學立傳蔡元定陸九淵皆不得與而入儒林

儒林以經爲綱道學不傳經者不得入並不輕於道學

不知何所輕重於其閒脫脫諸人所定之例何足爲典要高氏之言是也

一前志外傳諸人擬改附列傳之末不稱外傳也古者傳以傳經其不盡與經相傳者則稱外傳如春秋有內外傳韓詩有內外傳是也今於蔡確蔡京呂惠卿曾布諸人何取而稱外傳殆以其人不善外之之意乎然稱名不典矣史記傳商鞅呂不韋李斯諸人惡亦甚矣漢書傳孔光張禹劉歆諸人皆不足流芳者徒以關繫時事不能置諸不論然並未嘗特立傳名如後世唐書五代史之有姦臣傳也則

不如置諸列傳之末畧如漢書之傳王莽舊唐書之傳朱泚諸人焉  
一擬增貨殖一傳以處鄉人之僑寓外國經營工商者其鼎革之際奔亡在外或效  
包胥之哭或賦旄邱之詩宜只入列傳或酌入忠節傳  
一列女宜錄賢媛才媛不專取節烈也四德舉於周官曰婦德婦言婦容婦工列女  
之名昉於劉向乃羅列女之衆行非節烈之烈分爲七類而終以嬖孽六可法一  
可戒也章氏學誠云曹昭重其學使爲丈夫則儒林之選也蔡琰著其才使爲丈  
夫則文苑之材也劉知幾譏范史之傳蔡琰其說甚謬而後史奉爲科律專書節  
烈一門然則充其義例史書男子但具忠臣一傳足矣是之謂不知類也遷固之  
書不著列女非不著也巴清叙於貨殖文君附著相如唐山之入藝文緹縈之見  
刑志不特楊敞之有智妻買臣之有愚婦也蓋馬班法簡不屑屑爲區分類別亦  
猶四皓君平之不標隱逸鄒枚嚴樂之不署文苑也云云案詩稱女士傳云女有  
士行則無非無儀不可以詞害意矣

一列女傳首書法有名者宜著姓名及字

士昏禮有問名曲禮  
女子許嫁笄而字

無名者稱氏先書某邑人

從後書某邑

從

某人妻范書列傳皆用班傳書法而列女篇首獨用郡望夫名已

失列女名篇之義矣章氏譏之是也

一前志僑寓與遊客往往混淆僑寓當爲立傳遊客只宜入軼事類也

一古人左圖右史故志必有圖由來久矣惟圖學日精舊圖每病疏畧今臺域府州  
縣各圖悉用界畫至名勝各圖仍用毛筆畫以畧存山水面目

沈瑜慶

陳衍 擬

# 古籍电子书

欢迎您的光顾

网址：<http://www.xy980.net>

QQ:77815100 电话:15879335110

联系制作：古籍电子书工作室